



## Po nalogu Kantonalnog tužilaštva Sarajevo

# SIPA provjerava račune u KCUS-u

Pripadnici Državne agencija za istrage i zaštitu (SIPA) početkom sedmice ušli su u prostorije Kliničkog centra Univerziteta u Sarajevu (KCUS). Tu informaciju za „Avaz“ je potvrdila portparol Kantonalnog tužilaštva Sarajevo Azra Bavčić.

Kako su mediji ranije izvijestili, pripadnici SIPA-e izuzeli su dokumentaciju iz KCUS-a koja se odnosi na nezakonito zadržavanje novca Ljekarske komore. Tada je uslijedila pobuna određenog broja uposlenika KCUS-a, koji su tražili da se novac prebacuje na račun Ljekarske komore. Neki od ljekara koji su se suprotstavili odluci generalne direktorice bili su prisiljeni napustiti KCUS, a Komora je oštećena za više od 20.000 KM.

Primarius doktor Fahrudin Kulenović, komentirajući provjere SIPA-e u ovoj

bolnici, kazao je da se „znakakvi su zadaci SIPA-e, ona ne istražuje pošten svijet“.

- Otudjenje novca od članarine ljekara je nezakonit i nasilnički čin, poslije kojeg je uslijedila rijetko viđena agresivna kampanja na Komoru i mene.

Sve je završeno montiranom godišnjom skupštinom na kojoj su smijenjena sva rukovodeća tijela Komore. Pogrom je izbjeglo samo pet članova Upravnog odbora, koji su već ranije dokazali svoje vazalstvo rukovodstvu KCUS-a! Na toj nestatutarnoj skupštini birani su rukovodeći ljudi u Komori, koji nisu ni prisustvovali tom skupu, niti imaju podršku od kolega iz svojih Institucija - kaže dr. Kulenović.

On je nezakonito smijenjen s mjesta predsjednika Ljekarske komore Kantona Sarajevo, i to na zahtjev rukovodstva KCUS-a.

Kulenović je pojasnio da od 52 delegata iz KCUS-a, 21 u tom trenutku nije bio član Komore. Isključili su sami sebe neplaćanjem članarine, a četvero od njih nikad nije ni bilo u članstvu Komore! Kaže i da jedan član novoizabranog Upravnog odbora Komore nikad nije bio član Komore.

- Ova vijest da je SIPA u KCUS-A vraća meni, a i cjelokupnom građanstvu, vjeru da pravda postoji i živi i u BiH - kazao je za „Avaz“ dr. Kulenović. *A.Nu.*



**DR. KULENOVIĆ:**  
SIPA ne istražuje pošten svijet